

Dr. Rudy Lampe a papia na universidad na Alemania tocante legalizacion mundial di droga

DR. Rudy Lampe a papia na universidad di Alemania tocante e guerra absurdo contra narcotrafico. Dia 17 di juni 1971, Presidente Richard Nixon a proclama e guerra contra narcotrafico. A cumpli 40 aña di fracaso di e

guerra di Merca y di mundo contra e narcotrafico. E guerra contra droga a resulta un fracaso total. A gasta miles di miyones di dolar den e guerra aki. A encarcela miyones di ciudadano cu no ta un menaza pa comunidad.

Ta calcula cu rond mundo un 25% di esnan den prison tin di haci cu droga. Consecuencia di e guerra contra narcotrafico ta cu Mexico ta biba un ola di violencia sin precedente, cu ya a existi mas di 50 mil morto.

Mescos cu Colombia domina pa hopi tempo caba pa violencia dor di e guerra contra droga.

Hopi pais, manera Aruba, tin corrupcion den douane, polis, aparatonan di husticia, sector comercial, sector politico dor di e guerra declara contra droga.

Ora henter mundo tabata busca Montesinos pa labamento di placa y trafico ilegal, e tabata cana rond trankilamente na Aruba den tempo di Gabinete Henny Eman, segun Rudy Lampe.

El a drenta Aruba, haci su negoshinan, sali for di Aruba, te cu el a keda aresta na Venezuela.

Recientemente un capo grandi di Colombia tabata trankilamente na Aruba, mientras tabata un di e hendenan mas busca rond mundo.

E tabata den contacto cu hende local, haci su negoshinan, te cu e presion a bira asina grandi cu mester a areste.

Mescos un capo grandi di Bulgaria a keda asesina den un hotel local, mientras el a drenta Aruba trankilamente pa haci su negoshinan.

Kier men e guerra contra droga ta un fracaso.

Awendia ta mas facil pa haya

droga cu 40 aña pasa. Awendia droga ta mas barata cu 40 aña pasa. Awendia tin hopi mas droga cu 40 aña pasa. Den e reciente informe di Comision Global di Politica tocante Droga, cu ta inclui decenas di ex Presidentenan, manera Jimmy Carter y Koffi Annan, kendenan a gana Premio Nobel di Paz, a conclui cu e guerra contra droga ta un fracaso. Rev. Jesse Jackson, bon conoci na Aruba y kende ta pastor Bautista y politico, a caba di publica un articulo unda e ta haci un yamada "cu ta tempo pa pone fin n'e guerra fracasa contra droga".

E problema di droga no ta un asunto criminal ni di seguridad. E ta parti di e cantidad di adiccionnan cu e ser humano por sufri di dje, manera adiccion na alcohol, adiccion na casino of wega di placa.

Tur adiccion mester haya un contesta medico. E famoso neurocientifico Nora Volkow, cu ta dirigi e investigacionnan riba e causa quimico y biologico di adiccionnan a bisa den un entrevista cu New York Times: "Tur adiccion por keda reduci na un cos, esta dopamina. Pesey mester saca drogadiccion for di e sistema di husticia penal y trate denter di e sistema di salud publico. Enbes di gasta placa serando drogadicto den prison, mihor trata nan den clinica pa nan rehabilitacion".

Dr. Rudy Lampe ta uni su voz

cu centenares di ex Presidente, intelectualnan rond mundo cu ta pidi pa pone fin n'e guerra absurdo contra droga. Riba e portret por aprecia dr. Rudy Lampe hunto cu prof.dr. Meier, kende t'e organizador di e encuentro academico na Alemania unda dr. Rudy Lampe a papia tocante e necesidad di legalizacion mundial di droga.

Claro cu mester sigui cu programanan educativo na scol y den medionan pa spierta nos muchanan y hobennan riba peliger di droga, alcohol, abuso di junk food, abuso di remedi, etc., tur loke ta dañino pa nos salud.

Pa conclui laga nos corda e cita aki di Milton Friedman, Premio Nobel di Economia: "Ilegalidad ta crea ganashinan absurdo cu ta financia tacticanan asesino di caponan di narco; ilegalidad ta hiba na corrupcion di funcionaronan di seguridad publico".

